

# In mais da pais

Las lingias grassas e finas dal fanadur 2020

DA DAVID TRUTTMANN/FMR

**C**un maschina u senza? Cun lufs u senza? Cun u senza rumantsch grischun? – Il fanadur è stà in mais be plain da «cun u senza».

**D**api quest mais èsi en mintga cas dad ir «cun» en tren e posta. Insumma èsi ina stad per girar cun maschina tras il mund. Il grond avantatg: Sche nus cuvrintar dis da bel sulegl la part sut da la fatscha cun ina maschina, alura vegnin nus brins en la part sura, exact là nua ch'i resta alv durant la stagiun d'enviern causa ils eglers da skis. Uschia datti – guardà sur l'entir onn – ina bella «bronzatura» eguala tranter sura e sut. D'enviern vegn brina la part sut da la fatscha, la stad la part sura.

**I**ls da Mustér van cun grond schlantsch vers l'avegnir. Suentar ch'els han fatg «guotas cun tgau» tar il Center da sport e cultura «Fontauna» è uss en discussiun anc ina punt pendent betg lunsch davent dal center. Però chara glied da Mustér: Adatg cun projects da punts per peduns! Atras regiuns rumantschas han fatg las davosas emnas pauc bunas experienschas cun quellas. Il project a Solas cumbatta encunter recurs da las uniuns per la protecziun da l'ambient. Ils Samedrins han refusà il credit dad 1,6 milliuns per ina punt da peduns sur l'En. E tar quels da Scuol èsi anc mender: Lur veglia punt da peduns da Gurlaina è falombra. Damai adatg da betg

duvrar a Mustér «guotas senza tgau».

**S**enza rumantsch grischun! Quai ha decis la vischnanca da Surses la fin da quest mais. La discussiun ordavant è dentant stada «cun sal e paiver». Surtut ils adversaris dal rumantsch grischun han fatg valair durant la campagna ch'i na saja gea nagin problem da chat tar scolastas e scolasts surmirans e

dad elavurar meds d'instrucziun en l'idiom surmiran. E buna letteratura surmirana – «nign problem». Uschia vegni a dar proximamain in temp da la cucagna linguistica en il Surmeir, cun blera glied engaschada a nivel linguistic-cultural. Surtut tar l'Uniun Rumantscha Grischun Central vegni a dar in turnaround: Per il presidi da l'uniun – che fiss gea atgnamain disponibel dapi passa

in onn – vegni a dar silmain 15 candidaturas.

**L**a Lia Rumantscha è dapi in mais senza secretari general, per la paja cun in headhunter. L'emprima giada en sia istorgia è l'uniun tetgala rumantscha ida per agid professional per recutar ina scheffa u in schef operativ. I tracta perfin da la medema firma ch'ha gia tschertgà e chattà il nov directur dad RTR. Il headhunter na sto damai gnanc pli sgrattar ensem novas adressas da mail u numers da telefon, mabain simplamain telefonar anc ina giada a tut quels 15 candidats e candidatas ch'eran sin la glista per RTR. La dumonda è mo sch'ina u in da quels 15 ristga propi dad ir en la «tauna da l'urs» da la Lia?


**E**r ils purs sisum ed entadim la Surselva giavischassan in headhunter – in «hunter» da chau da lufs. Per puspè avair bellas alps senza lufs.

**L**a plaiv da Breil era senza padrin u madritscha. Senza padrin per il «zenn pign». Els han perfin pajà inserats per chattar in padrin (u ina madritscha). Ed era sin las raits socialas ha la plaiv fatg palais ch'i duvrass in sponsur per circa 9000 francs. Senza success. Enfin ch'in redactor da la FMR è vegnì en acziun ed ha scrit in artigel davart il «zenn pign». E zac – in lectur attent ha legì l'artigel durant sias vacanzas ed ha telefonà be direct al president da la plaiv ch'el veglia surpigliar tuttiquanti da quels 9000 francs. Facit legrai-

vel: Gasettas rumantschas vegnan legidas perfin en las vacanzas, inserats e Facebook dentant betg.

**C**un paucas e posaunas ed in grond camiun ha Not Vital fatg furora quest mais en l'Engiadina. A Susch, sin l'areal dal nov Muzeum Susch da l'investura e curaatura Grazyna Kulczyk, ha el mess ina tur da marmel da diesch meters autezza, ina tur alva da bunamain 30 tonnas. La vopna da Susch ha si trais turs nairas. Ussa sto vegnir ponderà sche quella vopna na duvrass betg ina correcatura.

**E**d anc bler «cun e senza» hai dà il davos mais: La festa da s. Placi tradiziunala a Mustér ha bain gi lieu quest onn cun messa, però senza «pievelun». Il pauper s. Placi ch'è mort sco martir vegn a sa dir: Pli gugent ina messa senza pievelun che senza chau. Ed alura anc il 1. d'avust: I vegn a dar quest onn ina festa naziunala senza festa. Ils chauns ed ils giats sa legran gia sin ina notg ruassavla senza rachettas e cun bler paus.



ILLUSTRAZIUN JON BISCHOFF

## In mais da pais

(fmr/dat) Tgeninas èn stadas las lingias grassas e finas dal mais passà en Rumantschia, en Grischun ed insumma? Quai ans dumandain nus da la FMR mintga fin dal mais. Tge paisa e tge paisa mo in zichel? Nus laschain repassar schabetgs, dain ina survista casuala e commentain quai cun in surrir. Mais per mais illustrescha il Bregagliot rumantsch Jon Bischoff il «Mais da pais» cun in «schurnal grafic».